

中華民國三十四年二月

張江陵全集
上

國民政府軍事委員會印行

515

中華民國廿五年九月廿一日收到

誠非偶然。考江陵挾持之具。其大旨不外厲行法治。信賞必罰。綜覈名實而已。其失却時代性之擁護君權。忠鯁過人者。姑且勿論。卽如考成朝局。嚴課官吏。振舉武功。勦捕盜賊。制服蠻夷。懲治豪右。驅逐儉壬。莫不雷厲風行。一時振肅。其他凡有益於國計民生者。亦靡不次第畢舉。所謂法治人治。兩者俱盡。江陵生平服膺子產及武侯之嚴法。其志趣已可概見。若論其功業。江陵殆有過之。至其身後。遭禍。乃專制驕主。妄聽讒言所致。於江陵節概。仍無所損。清代四庫全書提要。至謂其功過不能相掩。實未一究其

成錦可以鑠金。何難積設於無言枯骨。良用浩歎。然而江陵得剖白於天下後世者。賴全書之存也。其當日之心跡。與夫政猷之展佈。無不斑斑可考。足與史乘相互證明。卷末附錄後人評議各家言各有當。因將全書重付排印。用廣播傳。俾後之講求治法者有所取資焉。中華民國二十四年一月蔣中正序於軍事委員會辦公室

重刊例言

一 此書凡四刊本。一明刊本。二鄧刊本。三陶刊本。四爽刊本。爽本關於後人論列及題詠諸作。廣爲採輯。故由四十七卷增至四十八卷。且變更前刊編次。（前刊列詩編首）以奏疏列前。書牘次之。文集詩集又次之。女誠直解又次之。較之前刊爲當。獨其目錄則各冠于每一集之前。全編分五集。仍可合成全書。但既稱全書。目錄分離。殊乖體例。茲由本會重爲編訂。各集前後次序。一循爽舊。惟目錄則統納編首。庶昭畫一。並將爽刊第五集附錄（卽四十七八兩卷）各作者目錄概行列入。俾便檢尋。

一 我國古籍。向不注意分開句讀。鈎棘模糊。動多訛誤。此在文化上影響殊大。每逢句讀費解時。當必增多無謂之腦煩。宜讀者望而生厭。茲刊依照前刊本細攷詳稽。點逗分句。俾讀者一目瞭然。自信較爽刊爲明晰也。

一 重刊附錄。對文忠諸子若孫諸述略傳記。有混入各家序跋評論中者。殊失倫次。現均附于文忠行實之後。以歸一律。俾攷求文忠家世者得備覽焉。

一 茲刊編審及校讎。僅閱數星期。就中有譌脫及無法辨別者。一仍其舊。未便擅改。其有錯漏顯著者。無不隨處證正。然時間匆遽。欲求精審。誠非易事。容有舛謬。希大雅教正之。

清四庫全書提要

太岳集四十六卷

浙江巡撫
探進本

明張居正撰。居正有書經直解已著錄。神宗初年。居正獨持國柄。後毀譽不一。迄無定評。要其振作有爲之功。與威福自擅之罪。俱不能相掩。至文章本非所長。集中奏疏啓劄最多。皆在廟堂時論事之作。往往縱筆而成。未嘗有所鍛鍊也。

清四庫全書提要

張文忠公遺像



明史本傳

張居正字叔大。江陵人。少穎敏絕倫。十五爲諸生。巡撫顧璘奇其文。曰。國器也。未幾。居正舉於鄉。璘解犀帶以贈。且曰。君異日當腰玉。犀不足溷子。嘉靖二十六年。居正成進士。改庶吉士。日討求國家典故。徐階輩皆器重之。授編修。請急歸。亡何。還職。居正爲人。頎面秀眉目。鬚長至腹。勇敢任事。豪傑自許。然沈深有城府。莫能測也。嚴嵩爲首輔。忌階。善階者皆避匿。居正自如。嵩亦器居正。遷右中允。領國子司業事。與祭酒高拱善。相期以相業。尋還理坊事。遷侍裕邸講讀。王甚賢之。邸中中官亦無不善居正者。而李芳數從問書義。頗及天下事。尋遷右諭德兼侍讀。進侍講學士。領院事。階代嵩首輔。傾心委居正。世宗崩。階草遺詔。引與共謀。尋遷禮部右侍郎。兼翰林院學士。月餘。與裕邸故講官陳以勤俱入閣。而居正爲吏部左侍郎。兼東閣大學士。尋充世宗實錄總裁。進禮部尙書。兼武英殿大學士。加少保。兼太子太保。去學士五品。僅歲餘。時徐階以宿老居

首輔。與李春芳皆折節禮士。居正最後入。獨引相體。倨見九卿。無所延納。間出一語。輒中肯。人以是嚴憚之。重於他相。高拱以狠躁被論去。徐階亦去。春芳爲首輔。亡何。趙貞吉入。易視居正。居正與故所善掌司禮者李芳謀。召用拱。俾領吏部。以扼貞吉。而奪春芳政。拱至。益與居正善。春芳尋引去。以勤亦自引。而貞吉殷士儋皆爲所搆罷。獨居正與拱在。兩人益相密。拱主封俺答。居正亦贊之。授王崇古等以方略。加柱國太子太傅。六年滿。加太傅。吏部尙書建極殿大學士。以遼東戰功。加太子太師。和市成。加少師。餘如故。初。徐階旣去。令三子事居正。謹而拱銜階甚。嗾言路追論不已。階諸子多坐罪。居正從容爲拱言。拱稍心動。而拱客搆居正納階子三萬金。拱以誚居正。居正色變。指天誓。辭甚苦。謝拱不審。兩人交遂離。拱又與居正所善中人馮保郅。穆宗不豫。居正與保密處分後事。引保爲內助。而拱欲去保。神宗卽位。保以兩宮詔旨。逐拱。事具拱傳。居正遂代拱爲首輔。帝御平臺。召居正獎諭之。賜金幣及繡蟒斗牛服。自是賜賚無虛日。帝虛已委居正。居正亦慨然以天下爲己任。中外想望豐采。居正勸帝遵守祖宗舊制。不

必紛更。至講學親賢愛民節用。揚急務。帝稱善。大計廷臣。斥諸不職。及附麗拱者。復具詔召羣臣。廷飭之。百僚皆惕息。帝當尊崇兩宮。故事。皇后與天子生母並稱皇太后。而徽號有別。保欲媚帝生母李貴妃。風居正以並尊。居正不敢違。議尊皇后曰仁聖皇太后。皇貴妃曰慈聖皇太后。兩宮遂無別。慈聖徙乾清宮撫視帝。內任保。而大柄悉以委居正。居正爲政。以尊主權。課吏職。信賞罰。一號令爲主。雖萬里外。朝下而夕奉行。黔國公沐朝弼數犯法。當逮。朝議難之。居正擢用其子馳使縛之。不敢動。旣至。請貸其犯。錮之南京。漕河通。居正以歲賦逾春。發水橫溢。非決則涸。乃采漕臣議。督艘卒以孟冬月兌運。及歲初畢。發少罹水患。行之久。太倉粟充盈。可支十年。互市饒馬。乃減太僕種馬。而令民以價納太僕金。亦積四百餘萬。又爲考成法。以責吏治。初。部院覆奏行撫按。勘者嘗稽不報。居正令以大小緩急爲限。誤者抵罪。自是一切不敢飾非。政體爲肅。南京小奄醉辱給事中。言者請究治。居正謫其尤激者趙參魯於外。以悅保。而徐說保裁抑其黨。毋與六部事。其奉使者。時令緹騎陰誦之。其黨以是怨居正。而心不附保。居正以

御史在外往往凌撫臣。痛欲折之。一事小不合。詬責隨下。又勅其長加考察。給事中余懋學請行寬大之政。居正以爲風已。削其職。御史傅應楨繼言之尤切。下詔獄杖戍。給事中徐貞明等羣擁入獄。視具橐。亦逮謫外。御史劉臺按遼東。誤奏捷。居正方引故事繩督之。臺抗章論居正專恣不法。居正怒甚。帝爲下臺詔獄。命杖百遠戍。居正陽具疏救之。僅奪其職。已卒戍臺。由是諸給事御史益畏居正。而心不平。當是時。太后以帝冲年。尊禮居正。甚至同列。呂調陽莫敢異同。及吏部左侍郎張四維入。恂恂若屬吏。不敢以僚自處。居正喜建豎。能以智數馭下。人多樂爲之盡。俺答款塞。久不爲害。獨小王子部衆十餘萬。東北直遼左。以不獲通互市。數入寇。居正用李成梁鎮遼。戚繼光鎮薊門。成梁力戰卻敵。功多。至封伯。而繼光守備甚設。居正皆右之。邊境晏然。兩廣督撫殷正茂。凌雲翼等亦數破賊有功。浙江兵民再作亂。用張佳允往撫。卽定。故世稱居正知人。然持法嚴覈。驛遞省。冗官清。庠序多所澄汰。公卿羣吏不得乘傳。與商旅無別。郎署以缺少。需次者輒不得補。大邑士子額隘。艱於進取。亦多怨之者。時承平久。羣盜蝟起。

至入城市。却府庫。有司恆諱之。居正嚴其禁匿。弗舉者。雖循吏必黜。得盜斬。卽決。有司莫敢飾情。盜邊海錢米盈數例。皆斬。然往往長繫。或瘐死。居正獨亟斬之。而追捕其家屬。盜賊爲衰止。而奉行不便者。相率爲怨言。正居不恤也。慈聖太后將還慈甯宮。諭居正。謂我不能視皇帝朝夕。恐不若前者之向學勤政。有累先帝付託。先生有師保之責。與諸臣異。其爲之朝夕訥誨。以輔台德。用終先帝憑几之誼。因賜坐蟒白金綵幣。未幾。丁父憂。帝遣司禮中官慰問。視粥藥止哭。絡繹道路。三宮賻贈甚厚。戶部侍郎李幼孜欲媚居正。倡奪情議。居正惑之。馮保亦固留居正。諸翰林王錫爵。張位。趙志皋。吳中行。趙用賢。習孔教。沈懋學輩。皆以爲不可。弗聽。吏部尙書張瀚以持慰留旨。被逐去。御史曾士楚。給事中陳三謨等。遂交章請留中行。用賢。及員外郎艾穆。主事沈思孝。進士鄒元標。相繼爭之。皆坐廷杖。謫斥有差。時彗星從東南方起。長亙天。人情洶洶。指目居正。至懸謗書通衢。帝詔諭羣臣。再及者。誅無赦。謗乃已。於是使居正子編修。嗣修。與司禮太監魏朝。馳傳往代司喪。禮部主事曹誥治祭。工部主事徐應聘治喪。居正請無造朝。

以青衣素服角帶入閣治政。侍經筵講讀。又請辭歲俸。帝許之。及帝舉大婚禮。居正吉服從事。給事中李涑言其非禮。居正怒。出爲僉事。時帝顧居正益重。常賜居正札。稱元輔張少師先生。待以師禮。居正乞歸葬父。帝使尙寶少卿鄭欽。錦衣指揮史繼書護歸。期三月葬畢卽上道。仍命撫按諸臣先期馳賜璽書敦諭。範帝賚忠良銀印以賜之。如楊士奇。張孚敬例。得密封言事。戒次輔呂調陽等。有大事毋得專決。馳驛之江陵。聽張先生處分。居正請廣內閣員。詔卽令居正推。居正因推禮部尙書馬自强。吏部右侍郎申時行。入閣。自强素迁居正。不自意得之。頗德居正。而時行與四維皆自昵於居正。居正乃安意去。帝及兩宮賜賚慰諭有加禮。遣司禮太監張宏供張餞郊外。百僚班送。所過地有司飭廚傳。治道路。遼東奏大捷。帝復歸功居正。使使馳諭。俾定爵賞。居正爲條列以聞。調陽益內慚。堅臥。累疏乞休不出。居正言母老不能冒炎暑。請俟清涼上道。於是內閣兩都部院寺卿。給事御史。俱上章請趣居正亟還朝。帝遣錦衣指揮翟汝敬馳傳往迎。計日以俟。而令中官護太夫人以秋日由水道行。居正所過。守臣率長跪。撫按

大吏越界迎送。身爲前驅。道經襄陽。襄王出候。要居正宴。故事。雖公侯謁王。執臣禮。居正具賓主而出。過南陽。唐王亦如之。抵郊外。詔遣司禮太監何進宴勞。兩宮亦各遣大璫李琦。李用。宣諭賜八寶金釘川扇。御膳餅果醪醴。百僚復班迎入朝。帝慰勞懇篤。予假十日而後入閣。仍賜白金彩幣寶鈔羊酒。因引見兩宮。及秋。魏朝奉居正母行。儀從煊赫。觀者如堵。比至。帝與兩宮復賜賚加等。慰諭居正母子。幾用家人禮。時帝漸備六宮。太倉銀錢多所宣進。居正乃因戶部進御覽數目陳之。謂每歲入額不敵所出。請帝置坐隅時省覽。量入爲出。罷節浮費。疏上。留中。帝復令工部鑄錢給用。居正以利不勝費止之。言官請停蘇松織造。不聽。居正爲面請。得損大半。復請停修武英殿工。及裁外戚遷官恩數。帝多曲從之。帝御文華殿。居正侍講讀畢。以給事中上所上災傷疏聞。因請振復。言上愛民如子。而在外諸司。營私背公。剝民罔上。宜痛鉗以法。而皇上加意撙節。於宮中一切用度。服御賞賚。布施裁省禁止。帝首肯之。有所蠲貸。居正以江南貴豪怙勢。及諸姦猾吏民善逋賦。選大吏精悍者嚴行督責。賦以時輸。國藏日益充。而豪猾率

怨居正。居正服將除。帝召吏部問期日。勅賜白玉帶大紅坐蟒盤蟒。御平臺召對。慰諭久之。使中官張宏引見慈慶慈甯兩宮。皆有恩賚。而慈聖皇太后加賜御膳九品。使宏侍宴。帝初卽位。馮保朝夕親起居。擁護提抱有力。小扞格。卽以聞慈聖。慈聖訓帝嚴。每切責之。且曰。使張先生聞。奈何。於是帝甚憚居正。及帝漸長。心厭之。乾清小璫孫海客用等。導上遊戲。皆愛幸。慈聖使保捕海用杖而逐之。居正復條其黨罪惡。請斥逐。而令司禮及諸內侍自陳。上裁去留。因勸帝戒遊宴。以重起居。專精神以廣聖嗣。節賞賚。以省浮費。卻珍玩。以端好尚。親萬幾。以明庶政。勤講學。以資治理。帝迫於太后。不得已皆報可。而心頗嫌保居正矣。帝初政。居正嘗纂古治亂事百餘條。繪圖以俗語解之。使帝易曉。至是復屬儒臣紀太祖列聖寶訓實錄。分類成書。凡四十。曰創業艱難。曰勵精圖治。曰勤學。曰敬天。曰法祖。曰保民。曰謹祭祀。曰崇孝敬。曰端好尚。曰慎起居。曰戒遊佚。曰正宮闈。曰教儲貳。曰睦宗藩。曰親賢臣。曰去姦邪。曰納諫。曰理財。曰守法。曰儆戒。曰務實。曰正紀綱。曰審官。曰久任。曰重守令。曰馭近習。曰待外戚。曰重農桑。曰興教化。曰